



HARANGVE

Faite & prononcée par Messire PIERRE BOBYE, Conseiller du Roy en ses conseils, President en la Preuosté, Chastelenie & siege Royal de Gonneffe, lors de son instalation & prise de possession de sadite charge de President en la iustice Royale à Gonneffe, en presence de Messire Louys de Fortia, Conseiller du Roy en ses Conseils d'Estat & priué, & Maistre des Requestes de son hostel; & de Messire NOEL BOBYE Escuyer & Seigneur de Viencour en France, Conseiller du Roy, & Maistre d'hostel ordinaire de sa maison, de Messire ESTIENNE ROZE, Conseiller & Aumônier du Roy, Seigneur de la Grande maison au pays de Valois, Protonotaire du saint Siege Apostolique, & de plusieurs autres personnes de qualité.



Es Roys & les Souuerains disposent des honneurs & dignitez comme il leur plaist, & Dieu duquel ils sont les images viues en terre, leur donne communement vn esprit corespondant à la puissance qu'il leur confere, pour choisir ceux qui sont vtiles à leur

seruice, desorte qu'un Ancien auoit raison de dire que c'estoit vne espece de sacrilege de douter des qualitez de celuy que le Prince veut esleuer & honorer de quelque grade.

I'ay pensé plusieurs fois Messieurs sur le fait de l'Office, dont il a plû au Roy me pouruoir, ce que i'aurois à faire, le tiltre en est grand, il est auguste, & le nom en est venerable, puis que c'est le mesme, dont sa Maiesté honnore les plus grands Magistrats de son Royaume, & ainsi i'ay douté quelque temps, si ie le deuois accepter: Mais comme ie l'ay trouué dans la maison, & que i'ay l'honneur d'estre venu d'un pere iuge souuerain, en vne des Compagnies souueraines du Royaume, & des plus illustres & mieux remplis, lequel dans l'exercice de sa charge auoit reputation d'auoir quelque sorte d'experience, qui l'y a fait considerer & estimer, ie me suis promis de la bonté diuine, qu'avec un petit de soin que ie prendray à me former, elle me fera la grace de me donner les qualitez qui sont requises, pour les fonctions de la Charge dont ie suis pourueu, & dont ie prends aujourd'huy possession en consequence de la reception de ma personne, par des Magistrats souuerains, si considerables; qu'ils sont aujourd'huy un des plus celebres corps de l'Estat, & duquel ont esté tirez des personnes illustres, pour estre portez aux grâdes charges & dignitez de l'Estat. Ie me promets

cête faueur Messieurs, du Ciel, si iefuis aimé de vous qui est ce que ie souhaitte & d'esire le plus, vous asseurāt que ni la vanité, ny les gains, ou aucune autre chose ne m'a fait pēser à la charge: mais le seul desir de vous seruir. Le n'apporte icy aucune autre passiō que celle qui pourroit regarder le bien de la iustice, qui vous doit estre administrée: Le n'ay ny amour particulier, ny haine contre aucun, de lucre & de profit extraordinaire, ie n'en pretends point: & en cette verité, ie vous demande à tous vostre approbation, exhortant les Procureurs du siege & les autres Ministres & Officiers de iustice, de contribuer avec moy de toute leur puissance, pour faire que la iustice soit renduë sainctement, purement & innocemment, & Dieu nous conseruera tous, fera fleurir ce siege avec honneur, & viure vn chacun heureusement, sous l'obseruation des loix & des ordonnances sous le meilleur Prince, & qui promet le plus que la France ayt iamais veu.

[illegible]

11-12-1890